

671.3443
078
114

光州志

光州忠節志卷之二

五品
翎頂
武生

駱金堂

年五十六歲潘家店人少年熟習弓馬有百步穿揚之技同里咸以大器期之游庠後益自刻勵屢試不售志不少衰會咸豐六年粵匪竄擾武昌奮袂而起慷慨從戎隨同官軍攻克漢陽府城保舉五品翎頂入九兩年隨同光州張牧堵禦三河尖烏龍集等處十年隨同南汝光道鄭觀察分帶練勇每戰必先親昌矢石觀察頗倚重之十一年春光州秦牧諭令在本保潘家店辦團斯時各保築寨自衛均有團長金堂往來聯絡殆無虛日人以其曉暢軍事亦以長城

恃焉是年十二月十六日賊至力戰擊退明日
復率悍黨來撲金堂指揮如意大挫兇鋒奪獲
馬匹器械無算方謂兩戰兩捷賊必膽落不期十
八日黎明大股賊匪蜂擁而至金堂知勢不敵
仰天禱祝並激勵練勇以冀以少勝多卒因寡
不敵眾力戰陣亡其同時殉難姓名可攷者武
生駱紹蘭練勇聞念題丁
源潸金傳明四人而已

增
張守一

年五十四歲小呂河人平時潛心經史足不履
城市自咸豐六七年間髮捻蜂起目擊時艱乃
毅然以捍衛鄉閭爲任往來隣保籌商守助迨
烽火稍平卽伊唔不輟其素性然也咸豐九年

八月十四蟾輪甫滿鶴唳頻驚有捻逆孫葵心者率大隊過境勢如飄風急雨猝不及防守一邀練截擊爲賊所執痛罵不屈遇害

文生
涂煥章

年三十一歲潘家店涂家棚人聚族而居辦團目衛同治二年五月初二日粵匪竄擾本境煥章督率練勇親執戈矛踴躍赴敵旋以賊眾我寡身受重傷恐被執受辱急投河內殞命

文生
李仲泌

年四十二歲白露河人於李家瓦房家焉咸豐七年四月初六日皖匪來撲仲泌帶練迎戰見勢不敵知必不免於難乃奮不顧身縱橫馳驟忽飛躍手刃一賊羣賊恨甚追至本宅東首受

麟傷

而死

監生徐資異

年六十一歲沙溝店徐家塢人年高望重鄉里莫不畏服同治初年賊氛猶熾同里舉辦團練

另設練長數人而以資異總其成年逾花甲精力不衰每遇賊擾必偕練長赴敵顧盼自雄四年十一月十三日粵匪竄擾本境復偕練長夏尙顏等督率練勇奮力鏖戰柰該匪愈聚愈眾腹背受敵力盡身亡其同時殉難之夏尙顏等二十人姓名均列於後亦足以垂不朽云

監生張鴻熹

年二十二歲土亞港張家莊人同治二年五月初二日粵匪大隊過境鴻熹被擄脅令同行業

走至談家小窪地方鴻熹忽拔身帶
佩刀突刺一賊不中爲羣賊攢殺

廩生王會

年六十歲光州城內人學有本原負笈者不遠
千里而至旋赴永甯縣之鄉間教讀春風絳帳
成就良多同治紀元三月二十六日皖匪大股
圍城王會在城外遇賊裏脅知爲儒生欲挈之
同行會曰我年老書生不能殺賊爲
恨尙肯從賊耶罵不絕口被戕而死

文生程步瀛

年六十八歲仁和集人團練壯勇數百名聞警
赴援不分畛域不獨保衛本境計也咸豐十一
年十二月十九日與匪南竄步瀛率領鄉團在
光山縣之斛山寨迤北與賊接仗互有傷亡步

瀛受傷甚重猶手磨練勇血戰不必顧我旋被賊用刀亂砍殞命其時步瀛之長子監生程重三隨父赴敵見父被害單身持矛奮入賊營見賊便殺若有神助賊爲之却奈大股逆匪層層圍裏身不得脫登時被殺時年四十六歲

從九余文試

年四十六歲和睦店褚家橋人同治四年十一月二十五日粵匪擾害文試當戶兀坐毫無怯色賊壯之脅令同行文試應曰我之不避早拚一死快殺我以頸就刃遂遇害從容就義如文試者其庶乎

從九

王文元

年四十八歲白露河人咸豐十一年七月三十日息境土匪劉錦章等合數千人在白露河西晝夜焚掠王文元恐其偷渡河東急偕幫辦旗首從九汪會元等帶領鄉勇三百七十餘名合力堵禦幸未過河至三十日早飯後正在沿河防守該匪忽從集後蜂擁而來一時眾寡不敵王文元汪會元等均力盡陣亡其同時死難諸人姓名附列於後

廩生朱惟一

年五十二歲杜付店康家灣人咸豐十一年七月十七日粵匪犯境惟一率領鄉團奮力抵禦賊忽詐敗練勇趁勢追剿伏兵突起首尾不能相顧惟一身受重傷登時殞命其同時陣亡者

張有慶朱有祿王成此外姓名失攷未經呈報
尙不知幾人竟使泉壤沈淪孤忠湮沒可慨也
夫

耆民黃有湘

年七十二歲麻樹店黃家樓人桑榆景暮步履
蹣跚賊未到時先謂其兒孫曰我年逾古稀旣
不能敵又不能避一旦賊來尙肯忍辱偷生耶
爾等各尋生路不必顧我同治四年十一月初
十日粵匪犯境在桃
林鋪地方罵賊遇害

黃有霖

年七十八歲和睦店吳家集人年將日耄精力
未衰每與隣里談及時事輒慷慨激昂并口授

防禦諸策娓娓不倦人咸謂此老滿面冰霜不
幸而遇賊必不肯屈果於同治四年十一月二
十三日在本
宅罵賊遇難

童馬忠誠

年五十二歲白露河張家大營人博覽羣書講
求實學爲文有豪氣不拘拘於法度屢試不售
遂棄時文而爲根柢之學人亦樸實無華以獎
掖後進爲已任遊其門者如坐春風焉咸豐七
年四月十六日皖匪
擾境大罵不屈遇害

臧青雲

年四十五歲河陂寺人力耕謀食事母以孝聞
歲時伏臘殺鷄供母必跪進自田間回家午餐

母弗食勿敢食也故鄉里咸重之咸豐十一年十二月二十二日在途中被皖匪張落刑之黨擄去行至白露河范家廟前天將黃昏因念家有七旬老母我今被擄誰爲奉養思欲潛逃柰旁有一騎馬賊緊跟遂暗取賊人長刀砍賊落馬正欲狂奔羣賊攢刺受重傷而死

巨宅明

年四十二歲大沙灣人生有膂力血性過人時值皖匪騷擾民不聊生一歲之中數被焚掠該保辦團築寨籍以自衛宅明日與練勇貳百餘名演習刀矛幾成勁旅咸豐七年四月十六日皖逆入境帶勇堵剿在江家堰

地方遇賊接仗力戰捐軀

熊蔭田

年二十歲磨台寺白樹窩人年甫弱冠頗知節義爲重與人交忠信誠懇居然老成人也咸豐十一年十二月二十一日粵匪張總愚過境一時被擄者甚眾行至盤龍崗蔭田私語其鄉人曰我輩覲顏從賊不如速死之爲愈遂拔短刀擊賊遇害

凌文欽

年五十五歲上亞港仁和集人咸豐十一年粵匪到處騷擾文欽以死自誓不從賊亦不避賊志堅金石士大夫猶難之不謂得於鄉農也是年臘月十九日粵匪突至文欽在望河礮地方罵賊被殺嗚呼可謂不負初心矣

張元

年六十五歲

張清

年五十九歲上亞港東嶽社人胞兄弟也始終友愛鄉黨無間言平時扶杖優游壠篳和協隣里爲之感化迨咸豐十一年十二月十九日粵匪竄擾二老誓同生死先是避賊於光山縣之松山地方適匪至同時罵賊不屈死於難

牛映芳

年四十五歲白露河任家觀人先與練總王文元等同董團事聞隣境有警應聲而至賊知有

備往往繞道而去鄉里賴以少安咸豐七年四月十六日皖匪來撲遂偕王文元等奮力堵禦

擒賊目一人手斬之賊至愈
眾力不能支被賊扎傷殞命

李春華

年二十五歲州城南門保人貿易鄉間常居於
鄉同治十一年十月十一日粵匪竄至毛家集
一帶春華隨團堵禦因賊勢
兇橫所率勇多潰去遂遇害

李應洪

年十一歲

李應法

年九歲上亞港仁和集人胞兄弟也咸豐十一
年十二月十九日粵匪過境兄弟懼被擄受辱
攜手投塘內死嗚呼年纔舞勺誼篤吹壎形影
相依痛椿萱之早萎友恭無間願棣萼之同榮

何期兵火橫飛竟作池塘之夢尙喜姓名無恙
得沾雨露之恩哀彼童年猶存勁節爰書數語
以慰

孤忠

李斑

年六十九歲下亞港人白髮蒼顏兒孫繞膝戚
族咸羨之乃遭時多故烽火頻驚李斑招兒孫
諭曰人生如朝露況我暮齒殘年更無繫戀賊
至我必死爾等各自逃生勿絕宗祀我死無憾
矣未幾粵匪擾害以杖擊賊遂被
殺時同治四年十一月十三日也

陶慶餘

年六十歲下亞港人與李斑爲莫逆交相距里
許聞斑死慨然嘆曰大丈夫當如是也越數日

匪至亦罵賊而亡時四

年十一月十八日也

盧鳳選

年四十八歲光州小東關人時息境之烏龍集被土匪易添富騷擾風鶴之警一日頻聞鳳選在集貿易於咸豐五年四月二十三日土匪復肆焚掠鳳選憤恨填胸隻身迎敵力竭陣亡

劉宣

年四十歲高店人咸豐十年八月十三日晚匪犯境人心震恐不知所措劉宣潛往探視以覘虛實能戰則率團堵禦否則嚴守要隘而已行近賊營猝與賊遇猶手拔短刀格鬥被羣賊攢

刺而

死

警董樹林

年六十二歲白露河汪家溝人家人憫其警預
爲避寇計樹林曰我盲於目不盲於心食毛踐
土六十二年得罵賊而死亦足稍伸忠義之氣
甯死不逃也咸豐七年四月十六日皖匪入境
極口罵賊
被戕殞命

趙得勝

年二十一歲清水港人於南城東關家焉少年
好勇以從軍爲樂以殺賊爲快壯士也當同治
五年十一月十九日粵逆直抵關外城內居民
倉皇失措城外無數難民晝夜號哭聲震林木
守土者帶勇迎敵該逆愈來愈眾互有傷亡趙
得勝率領壯勇三十餘名突出關外助戰餘勇